

李文忠公奏稿

李文忠公奏稿

卷之五十二目錄

續發運軍鎗械片 光緒十年十月十五日

請照給津勝軍薪費片 光緒十年十月十五日

請飭催湖北撥還武毅軍餉摺 光緒十年十月二十六日

會奏吳大澂赴朝鮮摺 光緒十年十一月初三日

水師學堂請獎摺 光緒十年十一月初五日

奏保吳仲翔片 光緒十年十一月初五日

查覆獻縣新河情形摺 光緒十年十一月二十一日

查覆完固口工不可辦片 光緒十年十一月二十一日

查覆文大礮難開并製車片 光緒十年十一月二十一日

海防用款分別立案摺 光緒十年十一月二十一日

挪付鎗價片

光緒十年十一月二十一日

奏派德員緝譯片

光緒十年十一月二十一日

清釐藩庫摺

光緒十年十一月二十一日

各省電綫報銷摺

光緒十年十一月二十一日
附清單

覆陳海岸不能過敵摺

光緒十年十二月初一日

多倫木稅核實辦理摺

光緒十年十二月初一日

淮軍報銷摺

光緒十年十二月初一日

軍需交涉洋務片

光緒十年十二月初一日

提撥運庫存款辦防片

光緒十年十二月初一日

東明河工仍請東省協撥摺

光緒十年十二月初十日

礦務官本取償典恩摺

光緒十年十二月初十日

上海酌設臺捐局摺

光緒十年十二月十六日

酌設海防捐輸局摺

光緒十年十二月二十日

李文忠公奏稿卷五十二

全集一之五十二

桐城吳汝綸編錄

續發還軍鎗械片

光緒十年十月十五日

再欽奉九月二十九日

寄諭鮑超前存天津洋鎗等件據李鴻章奏稱除修整另撥他營外其餘不堪修理已另備前膛洋鎗二千桿派員解赴夔州著嚴催務期速到此外如有可撥鎗械及需用銅帽各件仍當設法接濟等因欽此遵查原撥洋鎗二千桿前據江漢關道電報已抵漢口剋日雇搭輪船馳赴宜昌臣復嚴催解員副將陶士傑迅速前進此時計早到夔交收仍飭令津局竭力設法續撥前膛洋鎗一千桿洋馬鎗五百桿六響手鎗二百五十桿連前共撥三千七百五十桿合之四川原撥洋鎗二千四百桿已有六千餘桿又撥

洋鎗所用大銅帽四百萬粒手鎗彈子卽丁字火十萬粒派記名
總兵倪開珩於十月初八日雇搭商輪運解赴滬換長江輪船轉
運漢口宜昌再換雇民船解赴夔州交收務期妥速以應急需其
沿途水腳照案飭天津支應局江海江漢關道宜昌鹽釐局核發
並飛咨江蘇湖北督撫臣轉飭遵辦妥爲照料暨咨鮑超查照外
所有續撥霆軍洋鎗銅帽各件理合附片覆陳伏乞

聖鑒謹

奏

請照給津勝軍薪費片

光緒十年十月十五日

再廣東水師提督曹克忠經臣於去冬

奏准飭募津勝准勇六營一哨駐紮山海關與正定鎮總兵葉志超所部練軍四營聯絡操防以資控扼每月酌給統領薪水銀一百兩公費銀三百兩差弁二十員每員月給薪水銀八兩業經咨部在案戶部以與楚軍章程未符原奏亦未將從優支給公費聲敘應將該統領每月支給銀一百兩其差弁二十員應刪除十員等因查該軍原設差弁二十員誠以軍火糧餉均須由津轉運且駐紮山海關內外地段較長彈壓巡查在在需人差遣茲既刪除十員應自此次接奉部文截至十年八月十五日止祇用十員前經發過薪水請免追繳以示體恤至曹克忠係專閫大員營務既繁公用較巨如辦理文案書識隨營工匠人等薪工口食及往來

公牘心紅紙張費皆增培且親兵小隊一哨薪糧之外並未另給
公費其旗幟各項須由統領備辦並各營勇夫隨時操防工作犒
賞皆取資於統領薪費之內前定月給薪水銀一百兩公費銀三
百兩僅可敷用實難核減該軍扼守邊關濱海要地正值防務喫
緊凡必需之款不得不酌量核給藉以固結軍心並非分外糜費
仰懇

天恩俯准照原定薪費銀數給發俾資辦公而免賠累伏乞
聖鑒敕部查照謹附片具
奏

請飭催湖北撥還武毅軍餉摺

光緒十年十月二十六日

奏爲湖北短解武毅軍餉疊經設法墊放現實無可籌墊請旨飭令迅速撥還並將嗣後月餉提前搭解以贍飢軍而重

畿防恭摺仰祈

聖鑒事竊查武毅步隊三營馬隊一營光緒六年因俄約未定京東海防喫緊由鄂調直歸直隸提督李長樂統轄駐紮蘆臺一帶所需月餉欽奉

諭旨仍由湖北源源解濟等因欽此歷年以來均係先期籌備搭交湖北轉運局運至天津行營銀錢所代爲核放近來閒有短欠卽由津所暫爲挪墊然皆隨墊隨還從無積欠鉅款如今歲之甚者該軍餉項本年僅據鄂局解到四關李長樂因軍士枵腹荷戈飢譁可慮疊次來津商借臣以畿防關係重要不得不勉應其請

節經飭所移緩就急儘力籌湊先後墊放銀至五萬四千一百餘兩之多一面咨催湖北迅卽如數撥還以清墊款迄今尙無報解消息而該軍急待支放前墊未完後關旋至指望毫無淮餉異常枯竭現存銀兩散給本營口食實慮不敷周轉不但無可通融且亟盼此項歸還稍救眉急既有自顧不遑之勢又無坐視呼號之理蘆臺爲北塘後路現值法夷開衅海防戒嚴屢飭該軍加勁操練嚴備戰守必須士飽馬騰方能固結軍心若懸釜待炊飢寒交迫怨咨之餘相率譁潰咎將誰歸溯查河南毅軍九營與武毅四營同時奉調北來均奉旨由本省濟餉今河南於毅軍餉需照章籌解毫無缺乏武毅一軍拱衛

神京所關尤重下寶第彭祖賢素顧大局其於根本重地斷不致

漠不關懷相應請

旨飭下湖北督撫嚴飭司道迅將前項墊款剋日如數撥還並懍遵前次

諭旨源源解濟將該軍嗣後月餉提前搭解以贍飢軍而維大局臣爲畿防緊要起見謹繕摺由驛具陳伏乞

皇太后

皇上聖鑒訓示施行謹

奏

會奏吳大澂赴朝鮮摺

光緒十年十一月初三日

奏爲遵

旨會商查辦朝鮮事宜恭報臣大澂由津啟程日期仰祈

聖鑒事竊臣等於光緒十年十月二十五日接奉十月二十四日

上諭據李鴻章電陳朝鮮又有內亂似由日人播弄主持擬請派

員查辦等語著派李鴻章吳大澂會同規畫一切事宜吳大澂接

奉此旨卽著酌帶數營馳赴朝鮮邊界察看情形或徑至該國都

城查辦或會商慶裕籌畫邊防由該京卿迅速定議前有旨令續

日隨同慶裕辦理海防本日已諭知速卽起程與吳大澂同赴朝

鮮會商一切等因欽此當由臣鴻章電致臣大澂迅卽來津面商

調度再赴朝鮮臣大澂由樂抵津日期曾經具摺報明在案臣等

連日籌商揣度日本政府未必遽有開衅之意似未便多調陸隊

致啟其疑惟華軍往來朝鮮口岸不能不派營紮守以通消息免致水陸梗阻先已電致旅順飭道員袁保齡飛調現駐金州之管帶慶軍正營參將方正祥酌帶步隊一營乘輪船前往朝鮮馬山浦登岸駐守並飭統領水師天津鎮總兵丁汝昌俟超勇揚威兩快船調回旅順卽由該鎮統率各船先行駛至馬山浦水陸相依爲緩急進兵之路以備不虞仍電飭丁汝昌於抵馬山浦後傳諭駐朝各營堅壁勿動以待臣大澂至朝查明設法排解現因大沽北塘封凍甚堅奉天陸路距朝過遠聞山海關深水高坡之地尙可設法上船一面電致上海旗昌洋樓雇用商輪剋期駛至山海關以便航海過發免誤事機臣大澂定於十一月初四日由津起程赴關約計續昌到津亦可同行至昌黎樂亭一帶臣大澂所部馬步礮隊十三營現可不調暫由臣鴻章督飭該軍統領嚴密操

防不致懈弛臣大澂酌帶健勇四百餘人攜帶後門洋鎗隨身防護亦足以資捍衛總之以查辦朝鮮亂黨爲名立意不與口人開衅即使情詞詭譎難以逆料但可與口舌相爭妥爲調停或不至以兵威相脅俟臣大澂行抵朝鮮查明該國亂黨起事根由再行詳細

奏報遇有要務當由旅順電報局密電臣鴻章隨時電

奏請

旨遵行所有臣等會商調度及臣大澂由津啟程日期恭摺合詞由驛六百里馳

奏伏乞

皇太后

皇上聖鑒謹

奏

卷一百一十五

七

水師學堂請獎摺

光緒十年十一月初五日

奏爲天津水師學堂辦有成效援案擬保俾資鼓勵繕單恭摺仰祈

聖鑒事竊查北洋籌購碰快鐵甲等船以管駕員弁需材甚亟經臣於光緒六年七月內奏請於天津建設水師學堂請

旨飭派前船政大臣光祿寺卿吳贊誠駐津督辦嗣吳贊誠因病回南就醫復經臣奏派二品銜分發補用道吳仲翔駐局總辦各在案迨七年七月學堂落成始添招學生入堂肄業其時北方風氣未開學生入堂之初非惟於西語西學咸所未聞卽中國文字亦僅粗通經飭監督各員嚴加約束教習各員認真課導欲其於泰西書志能知尋繹於是授以英國語言繙譯文法欲其於凡諸算學洞見源流於是授以幾何代數平弧三角八綫欲其於輪機

礮火備諸理法於是授以級數重學欲其於大洋駕舟測日候星
積算晷刻以知方向道里於是授以天文推步地輿測量其於駕
駛諸學庶乎明體達用矣然猶慮其或失文弱也授之鎗俾齊步
伐樹之桅俾習升降矧其技藝卽以練其筋力猶慮其或鄰浮薄
也教之經俾明大義課以文俾知論人論其靈明卽以培其根本
爲之信賞必罰以策其倦怠爲之月校季考以稽其知能蓋自開
堂以來一日之閒中學西學文事武事疊暑分時兼程併課數更
寒煥未嘗或輟疊經季考諸生課業月異而歲不同今年春秋兩
季經臣飭派委員羅豐祿邀同英俄兩國水師兵官到堂會考該
兵官等會謂歐洲水師學堂所留以俟上練船後指授之學此堂
均已先時預課羅豐祿亦謂堂中所授繁難諸學多爲從前閩廠
駕駛學堂洋教習所未及課計自開堂以來甫及三年而駕駛頭

班學生伍光鑑等三十名均已畢業堪上練船又課成肄業美國
回華學生王鳳喈等九名或充學堂助教或經分派各船成效歷
有可稽伏思水師爲海防急務人材爲水師根本而學生又爲人
材之所自出臣於天津創設水師學堂將以開北方風氣之先立
中國兵船之本茲際成效初收允宜甄陶在事激勸來茲庶幾人
材可期謹出查廣東設立同文館招募學生課以西國語言文字
每屆三年奏請分別給獎有案天津水師學堂所課西國語言文
字特其一端此外諸學視同文館實相倍蓰在堂各員弁盡心教
導洵屬異常出力學生亦攻苦逾恆現已屆滿三年著有成效據
總辦道員吳仲翔詳請援案奏獎前來臣查泰西各國水師強盛
皆以學堂爲根基中土創辦之初不得不多方誘掖冀收拔十得
五之效理合酌擬獎敘繕具清單恭呈

御覽仰懇

天恩俯准照擬給獎以資鼓勵伏乞

皇太后

皇上聖鑒訓示謹

奏

奏保吳仲翔片

光緒十年十一月初五日

再二品銜分發補用道吳仲翔於同治十三年經前船政大臣沈葆楨奏派船政局提調光緒六年請咨赴部時值天津創辦水師學堂經臣於七年四月奏派該道駐局總辦以資熟手計自開辦後已越三年在堂肄業諸生學有成就現由臣援案另摺奏請獎勵查該道吳仲翔才大心細體用俱備前在船廠七年於西洋水師規制實力講求能任勞怨光緒五年六月經前船政大臣吳贊誠附片奏保以該道留心海防通曉洋務堪勝海疆繁缺道員之任請

交軍機處存記奉

旨留中在案茲天津水師學堂勅辦之始選募學生肄習中西學業爲培養水師人才根本該道約束課導條理精詳現已漸有成

效所定課程規模均臻妥善目今中國自強之計以整頓兵船爲第一要義該道品學兼優於船務經營最久探討最深堪以幹濟時艱可否仰懇

天恩准將二品銜分發補用道吳仲翔仍

交軍機處存記酌予

簡用之處出自

逾格恩施伏乞

聖鑒訓示謹附片具

奏

查覆獻縣新河情形摺

光緒十年十一月二十一日

奏爲遵

旨確查獻縣河工實在情形請將朱家口開壩減水工程無庸議辦仍於上游四十八村設法補救恭摺仰祈

聖鑒事竊

臣欽奉光緒十年九月二十九日

上諭都察院奏直隸生員楊廷昕等呈訴毀壩改河關係民生利害請飭覆勘一摺前據太常寺卿徐樹銘奏獻縣新開橫河並堵塞古洋河該處淹灌成災當諭令該京卿馳往履勘旋據勘明覆奏擬將古洋河堵塞之處恢復深通由東北引入子牙河卽經諭令李鴻章等按照所擬撥款籌辦茲據生員楊廷昕等呈稱此次改挑新河地勢不宜築隄必遭潰決爲南岸三百餘村及下游九州縣之患繪圖歷陳又據民人宋宅三等呈稱前濬朱家口至臧

家橋新河一道首尾絕無壅滯北岸隄壩足資保障南岸缺口洩
水田禾成熟懇仍留新河各等語所呈各節是否於地勢民情實
有窒礙抑係藉詞阻撓著李鴻章畢道遠周家相確查實在情形
具奏等因欽此並准都察院工部咨送楊廷昕等原呈圖說暨府
尹臣咨請確查主政會辦前來臣查獻縣河工自徐樹銘具奏後
疊據獻縣北岸及河間肅甯任邱雄縣霸州保定文安大城等九
州縣紳民赴臣及府尹臣並各該道府州縣衙門紛紛呈訴大致
謂原開獻縣新河有益現擬開壩放水有害業飭天津道等勘議
在案欽奉前因臣復遴派天津道季邦楨署清河道劉樹堂津海
關道周復候補道吳廷斌前往督同官紳逐細查勘測量體察地
勢民情據實具覆茲據季邦楨等稟稱查楊廷昕等原呈謂徐樹
銘擬於獻縣朱家口改建石壩分滹沱之水過八里橋官莊窪出

念祖橋入子牙河地勢不安且謂八里橋低於朱家口一丈有餘
官莊窪底與子牙河底相平地低則難於地中挑河必在地上築
隄一遇盛漲水勢建瓴直下必至崩潰南岸潰則河獻肅三百餘
村盡付波臣北岸潰則獻縣以下九州縣盡成澤國等語是八里
橋官莊窪兩處地勢高低爲此案減水一大關鍵該道等帶領精
於儀器委員由朱家口下至八里橋東五十二里七分俱從古洋
河身測量實上高於下一丈二尺二寸八里橋平地至官莊窪四
十一里實上高於下一丈二尺官莊窪至念祖橋十五里計窪地
高於子牙河底一丈九尺三寸此一百八里之間總計上高於下
四丈三尺有奇勢若高屋建瓴是以一聞開壩放水民情驚懼遞
呈之楊廷昕等數十人均至該道等行次並片有紳民曹靖邦等
六百六人哀懇免其開壩又遞呈一百二十二紙其河閒府縣及

該州縣亦各往見或具稟投遞該道等詳加詢問僉謂漳沱本入
子牙河自同治七年由藁城北徙旁入古洋河該九州縣常遭昏
墊幸於光緒七年經前任清河道史克寬在朱家口築壩挽復子
牙故道民慶更生今若開壩放水挑一百八里之減河增二百餘
里之新隄毋論官守民守俱屬不易且減河之南有河獻肅三百
餘村夾襄在內縱使不決而東迫於子牙河隄西迫於減河隄南
北兩隄又復相交澍水亦無從宣洩卽或酌建閘座涵洞一遇盛
漲水面高於平地斷難放放若漫決則水勢更大民命莫保所謂
南岸潰則三百餘村盡付波臣也減河之北則爲古洋河舊道地
本窪下水所必爭隄防偶一不支則北岸一帶復成巨浸前功盡
棄渺茫猛悍異常人力幾何安能必其三分北而七分南所謂北
岸潰則九州縣盡成澤國也又自八里橋至念祖橋開河之地旁

繞四十六村墳墓一千七百五十餘塚平原沃野小民恆產所資
誰願失業古洋河本元時漳水所決迄今五六百年兩岸莊園聯
接耕種已久小渠斷港盛堤偶爲野潦所入東匯於五官淀而止
絕無去路非經流之大河也若恢復深通漳水浩瀚直瀉古洋河
兩岸必仍遭漫溢文大窪內之水至今尙未盡消此人人所共見
者總求保全大局無所偏倚等語該道等見各紳民逐日環繞哀
懇實屬利害切身查近年曾有請在獻縣挽漳水入于牙者略與
徐樹銘官莊窪之議相仿皆因佔用膏壤太多未敢興辦史克寬
所開之河由朱家口至臧家橋祇三十三里非徒取工短費省亦
因惜民地故也至建石壩減水三分之議曾經上游紳民請准擬
辦嗣因下游九州縣民情不順遂卽停止是徐樹銘原奏開壩減
水一節皆當日擬議欲行因有所未便而復罷者參稽往牘博訪

與論測量高下於地勢民情實有窒礙並非楊廷所等藉詞阻撓
該道等復至獻縣臧家橋以上原開新河兩岸週歷勘問新河係
由西而東上年漳水異常盛漲不能容納分繞四十八村坍塌房
屋不少並有損傷人口災餘情景尙覺淒涼在目據紳民馬蔭豐
等面懇開壩減水圈築護隄開挖引河三事當諭以開壩減水有
礙下游大局該紳民旋亦無詞至圈隄繞護四十八村長九十餘
里西南而緊傍漳水來路防守不易古洋北隄亦殊喫重似非萬
全之策饒陽之民並以阻遏水路爲慮而獻民因徐樹銘先有築
隄之奏求之益力遂將道員金福曾展寬新河南隄放開下游水
路之議曉諭饒民連日督同官紳妥爲商酌始據饒民王玉瑄等
具呈請聽獻民築隄惟隄身不可過高高則漫決之後水入難出
其患不可勝言祇宜能禦凌汛不失麥秋雖無大利亦無大害史

克寬當時薄新河南隄而復留缺口者正爲四十八村洩水計也其金福曾原議展寬新河南隄之工卽在圈隄工內應遠距新河北隄一二百丈以外並擬將原開新河尾略向北展另築北隄約六里上起萬家寨下接距臧家橋二里之河灣庶尾閘益寬而且順至引河係原開新河以上大窪由獻縣上通饒陽之道卽潞水來源史克寬辦已及半因無費停罷現饒民合詞懇請接挖以竟前功亦卽徐樹銘原奏統村西汜濫之水疏爲一河之議如遇水小可使引溜歸槽應仍照史克寬稟定原案挑至小隄村爲止一律挑寬十丈至四十八村呈繳鎗礮給領坍塌房價埋葬銀兩俱經河閒府督同印委辦結其補給新河展寬地價豁免錢糧各節現仍飭查分別辦理刻下新河水面低於兩岸數尺堅冰一片四十八村地畝俱已涸復種麥民情安謐繪圖貼說稟覆前來臣查

漳水本入子牙河自同治七年北徙漫歸古洋河該河並無出路沿河州縣疊被沈災民困已極臣與官紳幾經籌畫始於光緒七年奏開獻縣新河挽復子牙故道其上游四十八村本係漳水來路仍有漫淹之患然與下游九州縣相較其利多害少實不可同日而語徐樹銘憫念四十八村水患因擬開朱家口北壩減水至念祖橋與直省官民初議略同惟前經屢次相度皆因不便而止今又飭派該道等督同地方官紳詳細察勘實於地勢民情多所窒礙徐樹銘續奏亦謂下游之民既稱北壩足資保障應從民之欲此工自應無庸置議惟上游四十八村仍當設法補救疊經臣奏明飭辦有案現議圈築護隄展挑引河二項連開工約需銀五萬兩上下應俟春融冰泮由臣派員覆加察勘妥細勘議有無變通之處分別籌款酌核辦理總期有裨民生無礙大局所有確查

實在情形除繪具圖說咨送軍機處備查外理合會同兼管順天府府尹臣畢道遠順天府府尹臣周家楣恭摺合詞據實覆陳伏乞

皇太后

皇上聖鑒訓示謹

奏

查覆完固口工不可辦片

光緒十年十一月二十一日

再徐樹銘原奏下游別濬支河以洩子牙河巨漲之法擬從獻縣完固口以下至靜海擇要修濬分洩子牙之水穿運入海嗣又奏言滄州捷地減河至狹難容不如穿運之後將青縣興濟減河疏濬深通等因臣並飭李邦楨劉樹堂周馥吳廷斌等前往妥細勘議茲據覆稱該道等從完固口東下一路查勘至南運之興濟廢閘止計長一百五十六里內完固口至杜林鎮舊有河形閒多淤平者一百二十里由杜林鎮至興濟均係平地無河形者三十六里測量南運河之西岸地平高於杜林鎮之地平三尺五寸是下游高仰已無疑義又興濟減河長九十六里乾隆嘉慶以後未加修治河槽填淤已滿反高於平地二三尺連完固口以下併計其長二百五十二里無論道遠費煩無力興辦且完固口乃康熙年

閒潯水分流之道平原斷港小民墾種已久勢難急切遷讓而南
運一河關係南北漕運儲或湮闕衝決貽誤

國計民生更非淺鮮自黃流穿運以來南運河底日高現在隄外
地平已高於杜林鎮地平三尺五寸每歲大汛水高隄外之地又
五六尺不等全恃一綫單隄以爲保障若濬完固口引溢穿運恐
盛漲之時不能導溢潯以入而適以啟漳衛破壁而出也種種窒
礙難行非僅虛糜工費等情前來臣查此工亦經徐樹銘續奏停
止自毋庸議理合附片覆陳伏乞

聖鑒謹

奏

查復文大礙難開井製車片

光緒十年十一月二十一日

再奉十月初六日

諭旨徐樹銘奏文安大城兩縣地勢低窪請飭試行開井及製車
激水之法著臣等會同商辦等因欽此經府尹臣咨請查勘主
政會奏臣查原奏內稱文安大城兩縣地勢低窪應仿白居易於
杭州開通六井之例濬深以容水培高以居民又宜仿甘肅城外
製筒車激水自運入城之法使之越隄入河等語飭據李邦楨劉
樹堂周馥吳廷斌覆稱文安縣知縣殷謙大城縣知縣陳壽椿並
該兩縣紳耆陳環瀛溫如臆等會謂文安大窪形如釜底掘地三
尺泉即湧出開井墊地勢難舉辦若以筒車激水地勢異宜深恐
勞民費帑無益於事該道等查文大窪地均介大清子牙兩大河
之間自同治七年濬水由薊城北趨古洋河以達文安窪頻年水

患漫成澤國道光緒七年濤沱挽歸于牙故道以後該窪漫水漸
消民獲耕種八九兩年大清子牙各河盛漲間有漫溢處所均經
隨時堵護前在文窪之下游壩臺地方建立石閘兩座洩入子牙
現又擬在西灘里村再建一間洩入東淀誠使各河隄加意防範
文窪水患自減卽遇盛漲之年偶有漫溢藉此三閘亦可逐漸分
消該道等親歷該兩縣查勘地勢開井製車民情地勢既多不順
應請無庸試行等情具覆前來臣覆核無異理合會同兼管順天
府府尹臣畢道遠順天府府尹臣周家楣合詞附片覆陳伏乞
聖鑒謹奏

海防用款分別立案摺

光緒十年十一月二十一日

奏爲光緒九年分北洋海防用款應行立案者先開簡明清單奏報隨後造冊銷恭摺仰祈

聖鑒事竊查光緒元年六月總理各國事務衙門會同戶部議撥南北洋海防經費案內奏明由督辦大臣將用款數目咨報總理衙門及戶部查核原以籌辦海防事屬創始一切用款並無例案可循亦非他項軍需所可比例是以僅令將用款數目咨報前已飭天津海防支應局司道將元年至六年用款數目彙造清冊分咨核銷嗣於八年十一月戶部議奏軍需善後報銷章程以各省購買輪船機器外洋鎗礮電綫等件既無定例可循部中無憑稽核其添購各項經費若干雖不能限以定數亦當立有範圍事前奏明報部立案事後方准核銷等因復飭局將七八兩年海防用

款數目彙冊咨報備查自八年以後自應分別奏咨立案臣維立案之意必部中無案者始行奏咨以備核銷時有所稽考其曾經報部有案及常年照章支用各款毋庸再行立案至造冊報銷須將用款逐項詳細開列若立案祇須簡明總數盡與銷冊本有繁簡之不同也惟是非洋海防之設取法泰西諸國凡購一物製一器必先訪求新式詳細審察爲各國海防所不可少者方始議辦其價值等項尤必諮商比核務求核實節省而後定議往往於重洋數萬里外函賈商推動輒經年累月勢難隨時奏咨所用員弁人等須一再遴選試驗以期人與事宜薪糧工料等項則視其才質高下物用精粗然後斟酌核定頭緒太多鉤稽非易惟有每屆一年將應行立案各款彙開簡明清單奏咨一次庶辦理可期簡易而稽核亦免紛煩仍於部章立有範圍之意昭合所有光緒九

年正月起到十二月底止經支北洋海防經費用款除舊有各船
原支薪糧煤斤水手號衣等項及水師學堂行營製造局各項常
年經費華洋文武員弁人等薪餉糧乾暨一切照章支用款項入
年以前報部有案者均毋庸再行開報並旅順口應辦各項工程
業經專案奏咨其續撥用款銀十九萬三千餘兩應俟將來彙銷
亦毋庸再行立案此外采買製造等項並新添各船艇開支薪公
等項及原有各船添募員弁人等加增薪糧暨一切新支用款飭
據支應局司道按款摘開總數彙列簡明清單具詳聲明各款詳
細數目並各案緣由統俟造冊報銷時再行分晰開報其有零星
用款未便瑣屑立案者亦俟造送銷冊時再行併報等情前來
覆核無異除將清單分咨總理各國事務衙門並戶兵工部外理
合恭摺具陳伏乞

皇太后

皇上聖鑒敕部查照謹

奏

挪付鎗價片

光緒十年十一月二十一日

再十一月初三日准總理衙門電開本日奉

旨李鴻章電陳許景澄等電鎗彈均運海口美款不到索價急等語鎗既起運價應卽交著李鴻章就近於天津關運各庫或各營存餉迅速湊挪銀二十一萬餘兩卽日匯往給價一面派員卽赴戶部領回歸款欽此遵查出使德國大臣許景澄等定購毛瑟後門鎗一萬一千枝並子彈據電稱應先付價銀五萬三千鎊以美國劃借款未到請速另匯等因該鎗彈既經起運亟應設法匯付以免失信查自海防喫緊以來用款浩繁天津司局各庫羅掘殆盡惟前項鎗價關係外洋交涉奉旨迅速挪墊敢不欽遵妥辦經飭海防支應局長蘆運司准軍銀錢所各於現放軍餉內竭力籌湊卽在西商匯豐銀行訂買英金

五萬三千鎊由津電匯柏林使館交收按該洋行電匯時價現係封河期內每英金一鎊合庫平銀三兩九錢五分五釐六毫九絲九忽其應合庫平銀二十萬九千六百五十二兩四分七釐議定先行發電匯寄一面將前項鎊價由運庫挪墊銀十一萬兩銀錢所挪墊銀四萬兩支應局挪墊銀五萬九千六百五十二兩四分七釐於十一月初八日如數發交該洋商領訖初十日接准許景澄等初九來電前項鎊價五萬三千鎊已收到此鎊於初十開船以五千枝送粵東六千枝送滬交收等語除飭局詳請給咨派員赴戶部請領歸款並電商兩廣督臣張之洞俟前項鎊彈到粵酌量分撥滇桂前敵軍營應用其運滬鎊彈由臣隨時酌撥各路軍營應用外所有挪墊匯付鎊價緣由理合附片覆陳伏乞

聖鑒敕部查照謹

奏

奏派德員繙譯片

光緒十年十一月二十一日

再欽奉本年七月初一日電

旨著速卽選雇德兵官五十人赴天津由李鴻章調遣酌用川資等項在出使經費項下支給到津後每人辛俸若干由李鴻章酌定等因欽此當經臣電商出使大臣李鳳苞在德國延訪曾經戰事閒退兵官或精大小礮及鎗法或精礮臺及水雷布置各法密爲訂雇飭速來津嗣據李鳳苞電咨選雇總兵式百齡參將李寶等二十四名各有專長分起搭船陸續到津謁見臣飭營務處委員與之妥立合同酌定辛俸派往海防水陸各軍教練鎗礮技藝及西洋戰陣新法惟德弁遠道來華言語不通僅有繙譯博郎一員不敷遣用適李鳳苞代購奧國新式地雷五百枚派繙譯官候選知縣廕昌學習施放來津教授各營深資得力臣面詢廕昌

奏
聖鑒訓示謹
歷在德奧各邦留心武備討論兵法頗能通曉機鈴志趣不苟不
徒以語言文字見長現值防務喫緊之際亟應留營效用幫同所
履德員盡心教習該繙譯官係由同文館學生出洋期滿應請
敕下總理各國事務衙門轉飭廕昌留於北洋海防軍營差遣以
資臂助理合附片陳請伏乞

清釐藩庫摺

光緒十年十一月二十一日

奏爲遵

旨清釐藩庫查明歷辦軍需暨常年支項借墊各款請援案就款
開除恭摺仰祈

聖鑒事竊前准部咨欽奉

上諭清釐各省藩庫款項當經前署督臣張樹聲督飭藩司崧駿
查得直隸藩庫款目最繁自道光三十年清查至今閱時又久其
閒歷辦軍需善後及常年支項均因本款無存輾轉借墊轉輾甚
多應卽派員設局清理照歷次成案仍以前司交代爲依據以庫
帳原案爲考核分別逐細查辦業將一切事宜專摺陳明並酌擬
章程咨部奉

旨戶部知道欽此並經臣隨時督飭認真辦理茲據該司崧駿詳

稱自前司陳啟邁於道光三十年清釐以後起截至前署司方大
湜於光緒七年十一月卸事止共計三十一任挨任按年逐款稽
核所支各款或當時詳報奏咨或造入交冊報部具有案卷庫帳
可稽並無濫支隱匿等弊至借墊銀兩委因直隸係缺額省分道
光以前每年賴有部撥協餉銀三十萬兩以資挹注自軍興以後
非特協餉停撥且增出軍需鉅款復有協濟各路軍營糧餉力更
不支咸豐四年二月戶部奏令無論藩庫屬庫坐支存留各款均
應速行籌備軍用並欽奉

硃批敕將本省錢糧作為本省軍需等因不得不就藩庫所有之
款竭力挪移先其所急然顧此失彼遂致常年支項無本款可放
因又輾轉借墊從此年復一年庫款日形支絀借墊愈積愈多數
至一千二百四十餘萬內有一項發款零星借動數款者有將他

款所借之項未及支發又移作此款借用者有專款收存俟集有成數歸還原借續遇急需又經借用者茲查明歷前司借動報部正雜各款墊放兵差經費各路軍營糧餉以及常年支款共銀九百二十七萬六千六百四十九兩二錢七分七釐制錢二萬一千七百二串一百三十四文大錢合制錢二千七百四串三百二十文廢錢二串二百五十文均係應行支放之款造入交代報部其軍需各案亦經報銷毫無弊混現在司庫僅能量入爲出一切例支之項尙難年清年款如遇災歉收少用多尤覺異常竭歷斷無本款歸還舊借查歷次清釐庫款所有因公借動銀兩均奏准就款開除有案應請援案一律就款開除銷借此外借墊各款銀三百十八萬八千七百四十二兩五錢九分二釐制錢二萬六千九百八十九串二百七十三文大錢合制錢三百六十五串

二百十四文又制錢九千五百三串二百六十一文清錢四十五串七百一文亦於交代案內報部有案內除已入上次清查各款仍照原案分別辦理外其餘或係各營借支俸廉兵餉應分年按季扣還因欠餉未能給發一時無從核扣者或係州縣因災借支俸工工料因地糧尚未徵起未能解還並有蠲缺豁缺未經題撥不能歸補者有升調文武各官借支養廉扣存外省尚未解還者至於歷次恭辦

陵差

皇差以及

如嬪金棺采棺差務借墊經費應俟收有當雜稅本款歸還其借墊差費應由通省各官捐廉彌補此外應行歸還之款實因司庫萬分支絀一時不能籌還銷借應請各照原案應扣還者俟發款

時扣還應提解者上緊提解應捐補者按限捐補餘俟庫款稍裕陸續籌還以免顧此失彼將來還清一款隨即報部查考若竟無可歸還仍請就款開除或另行籌補均專案報部辦理務歸核實惟直隸藩庫向係入不敷出與他省情形不同嗣後遇有急用若必專待收有本款發放必致貽誤事機且有奉

旨及部文無論何款先行借動者所動雖非本款而同一公項同一正支於帑藏並無出入應請遇有不得已之款仍准酌量借墊以濟要需但能收有本款即應歸還原借否則隨時聲請就款開除免致積累成鉅轉多輾轉據該司開具傍明清單並造清冊詳奏前來臣覆加查核所詳均係實情應請照擬辦理除單冊咨部外理合恭摺覆陳伏乞

皇太后

奏
皇上聖鑒敕部查核施行謹

各省電綫報銷摺

光緒十年十一月二十一日

奏爲南北各省電綫官督商辦核明津貼各項用款循案截數報銷繕單仰祈

聖鑒事竊照天津至上海創設陸路電綫旋歸官督商辦由淮餉開支津貼巡電弁兵糧乾並電報學堂用款業經前督北洋通商大臣張樹聲截至光緒八年十二月底止分晰彙開清單專摺奏銷於九年五月二十日奉

旨著照所請該衙門知道單併發欽此嗣准戶部咨令將津貼巡電由商人自發復經臣奏請仍照原議暫由淮餉開支並因接辦蘇浙閩粵各省及天津至北通州電綫所需巡電等費仍由官款撥給亦均先後奏奉

諭旨允准在案查電綫用項本係淮軍報銷案外之事自應仿照

南洋成案統歸經辦之員自行報銷仍於淮軍案內將動撥銀兩照數登除以免糾轆飭據辦理電報事務候補道盛宣懷等核明計上屆截至八年十二月底止舊管存庫平銀一萬四千二百七十四兩有奇新收庫平銀一萬七千四百四十三兩有奇開除天津至上海電綫又天津至大沽口電綫九年分津貼巡電弁兵馬乾口糧並修理巡房經費湘平銀一萬九百七十兩有奇又天津至通州添設電綫津貼巡電弁兵馬乾口糧自九年八月十八日起至十二月底止湘平銀三百九十八兩有奇又添設蘇浙閩粵電綫前因工程尙未全竣沿途汛地里數未經查明先行酌撥九年分巡電弁兵馬乾口糧湘平銀一萬兩以便分給保護又天津電報學堂九年分經費湘平銀八千二百十兩有奇又因推廣各省電綫在上海添設電報學堂教習學生以便分撥值報自九年

六月起至十二月底止經費湘平銀一千八百九十兩又購辦機器書籍等項湘平銀一千四百兩統計由淮餉項下支過湘平折合庫平銀三萬一千七百十八兩有奇詳請核奏前來臣查刻值防務喫緊實賴各省設立電報得以聲息靈通有裨軍國大計此次自光緒九年正月一起截至十二月底止開支各款均照上屆成案實用寶銷並無絲毫浮冒除飭將支給細數分晰造具清冊咨送總理衙門戶部查核外相應繕具飭明清單恭呈御覽仰懇

天恩俯准照銷理合恭摺具陳伏乞

皇太后

皇上聖鑒敕部查照謹

奏

謹將光緒九年分津貼南北各省巡護電綫馬乾口糧銀兩
並電報學堂用款繕具清單恭呈

御覽

計開

舊管

一前次開報截至光緒八年十二月底止實存庫平銀一萬四千
二百七十四兩五錢九分九釐六毫七絲六忽

新收

一撥淮軍餉項庫平銀一萬七千四百四十三兩五錢七釐四絲
九忽八微

開除

津貼巡護電綫馬乾口糧項下

一天津至上海電綫計程二千七百三十六里又天津至大沽口
電綫計程一百二十里光緒九年分津貼巡電弁兵馬乾口糧並
各汛巡房一年修費共支湘平銀一萬九百七十兩六錢九分八
毫折合庫平銀一萬五百八十六兩四錢四釐三毫二絲三忽
一天津至通州電綫計程二百四十五里光緒九年八月十八日
起至十二月底止計四箇月十三日除小建一日津貼巡電弁兵
馬乾口糧並總巡馬乾共支湘平銀三百九十八兩一錢五分九
釐五毫又蘇浙閩粵電綫因未一律竣工先行酌撥九年分津貼
各汛巡電弁兵馬乾口糧湘平銀一萬兩以便分給保護俟查明
汛地里數歸於後案詳細開列兩共湘平銀一萬三百九十八兩
一錢五分九釐五毫折合庫平銀一萬三十三兩九錢二分七釐
九毫一絲六忽七微

電報學堂經費項下

一天津電報學堂委員漢教習司事夫役人等光緒九年分共支薪糧等項湘平銀二千八百三十二兩折合庫平銀二千七百三十二兩七錢九分九釐三毫八絲二忽四微

一天津電報學堂洋教習一名光緒九年分共支辛工湘平銀二千三十三兩六錢七分折合庫平銀一千九百六十二兩四錢三分三釐六毫五絲八忽二微

一天津電報學堂學生光緒九年分共支衣履膏火獎賞等項湘平銀五百九十一兩折合庫平銀五百七十兩二錢九分八釐一毫七絲六忽二微

一天津電報學堂房租伙食油燭茶炭盤川等項光緒九年分共支公費湘平銀二千三百二十兩折合庫平銀二千二百三十八

兩七錢三分三釐九毫五絲七忽三微

一天津電報學堂購買中外各種書籍洋紙筆墨機器等項光緒九年分共支湘平銀四百三十三兩九錢五分三釐七毫折合庫平銀四百十八兩七錢五分二釐九毫六絲七忽三微

一上海添設電報學堂每月津貼委員教習司事學生人等薪糧經費湘平銀二百七十兩自九年六月起十二月止計七箇月支湘平銀一千八百九十兩又購辦機器書籍器皿等項湘平銀一千四百兩共支湘平銀三千二百九十兩折合庫平銀三千一百七十四兩七錢五分六釐三毫四絲四忽七微

以上共請銷庫平銀三萬一千七百十八兩一錢六釐七毫二絲五忽八微

實存無項

覆陳海岸不能遏敵摺

光緒十年十二月初一日

奏爲煙臺旅順海面相距太寬須有大枝水師方可阻遏敵船恭摺覆陳仰祈

聖鑒事竊臣承准軍機大臣字寄光緒十年九月二十七日奉上諭延煦祁世長奏遵查山東籌辦海防情形呈遞圖說據稱煙臺北對旅順海面至此一束若能兩岸同心扼此要隘則津沽得有鎖鑰其防守之法應如何測淺深審沙綫備船礮設水師召募精習海戰之人必有出奇制勝之策等語該處爲海防要地必須經營布置以扼要衝以杜敵船北犯之路著李鴻章慶裕陳士杰將所奏各節會同悉心妥籌奏明辦理原奏著鈔給閱看等因欽此仰見

聖主綏靖北洋綢繆門戶欽佩莫名遵查渤海古稱少海言小海

也海道自黑水洋北來入山東之成山衛島嶼相望至登州漸漸收束非復茫無畔岸故昔人以小海目之按圖而觀煙臺在南旅順在北相距似近實則中隔海面尙有二百四十餘里之遙輪船南過煙臺者旅順不得而見北過旅順者煙臺亦不得而知臣嘗兩至威海三至旅順煙臺身履其地目擊而心數之非憑空揣測也由煙臺西行百五十里爲登州與旅順相對峙其閒海島凡十有四曰廟島曰長山曰沙礮曰大黑山小黑山大竹山小竹山曰候雞曰高山曰砣磯曰大欽小欽曰南隍城曰北隍城各島相距十餘里二三十里不等其中皆有行船之路泊船之地而登州至長山島海面四十里旅順至北隍城島海面六十里尤爲最寬原奏謂島嶼羅峙者卽此夫以二百餘里之洋面而十有四島星羅棋布若隱若見萬頃茫然任其所之敵船處處皆可闖入不惟堵

禦無從抑且瞻望不及於此而籌防守之法但當以戰爲防不能以守爲防原奏所稱備船礮設水師誠爲破的之論如欲杜夷船北犯之路必須船礮相當以鐵艦禦敵之鐵艦以快船禦敵之快船再以魚雷艇數十艘密布各島伺便狙擊方可制勝臣昔年創議訂購鐵甲近復經營旅順修濟船澳原以該處爲北洋首衝私冀鐵艦回華卽可在彼停泊練習水軍逐漸擴充使渤海有重門疊戶之勢津沽隱然在堂奧之中夷船萬一北犯必顧後瞻前不遽長驅直入竊謂北門鎖鑰計無逾於此者耿耿此心積有歲年徒以經費支絀不能暢所欲言德人又重違公法定遠等鐵甲船急切未能來華時勢所迫財力所限心有餘而力不足至勞九重東顧之憂此臣所爲昕夕焦慮引疚無窮者也目下北洋水師除超勇揚威兩快船調赴朝鮮其康濟威遠兩船專作練船並

無巨礮難任戰事六鎮蚊船只宜分扼海口未可馳逐外洋此外如煙臺之泰安營口之湄雲船身脆薄難禦大敵亦不足以聯絡聲援湊成一隊至閩廣沿海漁戶雖多習水性亦未經海戰且必須船礮得力與敵相埒始可酌量募用斷非空拳泗水所能摧陷敵鋒方今庫儲奇絀供億浩繁沿海陸營月餉正慮不敷若添設水軍餉力更難爲繼一時亦不得實用惟有就現有船隻量爲布置分泊各口與陸營礮臺相犄角但冀同心戮力堅穩撐持使敵船久泊大洋無可添煤水之口岸庶不遽懸軍深入若謂兩岸偕心遂可力扼要衝在

聖主必不爲空言之責成在微臣亦不敢飾詞以聳

聽所有遊

目籌辦緣由謹會同

盛京將軍臣慶裕山東巡撫臣陳士杰恭摺合詞具奏伏乞

皇太后

皇上聖鑒謹

奏

多倫木稅核實辦理摺

光緒十年十二月初一日

奏爲查明多倫廳木稅現在無可徵收難責廳員久賠巨款請援案核實辦理恭摺仰祈

聖鑒事竊准工部咨開多倫廳同知經徵木稅歷年延不報解奏請嚴催奉

旨依議欽此鈔奏知照到直查原奏內稱如果該廳稅額毫無徵收則前署廳王炳壇所繳四千餘兩何自而來可見商稅本自豐盈遇賢員則照額奉公遇俗吏則悉歸私囊等語當飭藩司松駿派委宣化府知府鄭賢坊前往該廳認真嚴查並札詢現任深州直隸州知州王炳壇當時徵收情形以爲印證旋據鄭賢坊稟稱該府遵赴多倫廳查明木稅始自康熙四十年其時克什克騰旗山場木植繁盛商販眾多稅收甚旺乾隆三十一年裁汰監督歸

同知徵收分水旱兩項以紅黃松木堪下水者照大河口則例上
稅由灤潮等河轉運其短小者爲旱木照張家口則例上稅聽其
運赴各口旋經明定稅額每年應解工部水木稅銀六千四百餘
兩枋榔把桿稅銀二百四十餘兩又解戶部旱木稅銀五百七十
餘兩稅額雖定而山場附近大木已砍伐殆盡須入深山尋覓道
遠費繁獲利有限商多裹足徵收不能如數迨至道光二十四年
僅收水木稅銀八十一兩零旱木稅銀二兩零計缺額七千餘兩
咸豐初年木產遂絕商販不通稅無可徵是以歷任同知均未請
領商填號簿曾於同治三年經前督臣劉長佑委員查明咨報旋
准工部核覆多倫木稅現既毫無徵收遠近蒙民人等均以牛馬
糞代薪無船料柴炭等稅自係實在情形與有稅可徵故意遲延
者不同令將咸豐四年以後循環號簿緩領等因此木稅無著之

實在情形也然咸豐以前各貨雜稅尙旺猶得以雜稅之有餘補木稅之不足乃軍興以後調兵調馬各旗苦累市面蕭條雜稅亦復缺額近年各省屢遭災歉蒙古草地亦荒旱頻仍物價益高銷路益滯該廳有本之商相繼歇業光緒六年查報字號已較咸豐初年減十之五嗣後復歲有減少卽如鋪民在各旗貿易應赴理藩院請領大票咸豐初年每年領票二百餘張同治初年尙有一百數十張至光緒九年僅領四十三張足爲生意淡薄遠不如昔之確證此雜稅支絀無從籌補木稅之實在情形也該府沿途細訪實因木已伐盡並無木稅可徵又據王炳垣稟稱多倫一帶山場木植早已砍伐一空此項額稅無收久爲廳員大累從前惟藉雜稅盈餘通融彌補近則雜稅往往缺額光緒七年委署多倫會奉督臣諭飭整頓追到境巡查郊野並無林木商人亦無一至檢

查案卷歷前任名下積欠木稅盈千累萬目覩情形不勝心悸寢食難安之狀幾有不能一朝居者幸將雜稅嚴查偷漏力裁浮費痛懲中飽始不虧短至木稅四千餘兩實難爲無米之炊惟念素來清苦自持若不將此款賄補恐加以侵吞稅課之名且遺子孫追呼之累遂將數十年所積修脯等項傾囊倒篋盡出以補官虧梟由藩司崧駿核明轉詳該司與鄭賢坊恭查嘉慶七年欽奉上諭顏檢奏密雲縣徵收木稅不敷定額請核實辦理一摺該縣管理古北口抽分事宜每年應解木稅銀一千一百二兩零今因商販寥寥無人領票辦理輸課山場砍伐既久近年民在附近各山采取柴薪照例輸課每年不過三四十兩至五六十兩自係實在情形除嘉慶二年至六年止應解稅銀仍在歷任知縣名下照數勒完外嗣後此項木稅自嘉慶七年爲始著卽儘收儘解不必

定以額數等因欽遵在案詳請援案核奏前來臣查多倫水旱木
稅前因廳員久不報解曾經疊次嚴查並遴員設法整頓僉稱山
場木植早空商販多年不至並無可徵之稅從前係藉各貨雜稅
挹注今以市面蕭條商民領票日少雜稅亦復短絀不能彌補木
稅遂致歷任積欠纍纍現又派令知府鄭賢坊前往確查並札詢
前署廳王炳壇所言皆同王炳壇前解木稅四千餘金據稱並非
徵之商民係罄昔年之私蓄以補官虧克己奉公實爲難得惟係
暫時權策爲數尙不甚多今明知稅無可徵若永遠責令廳員賠
繳巨款似乖政體且地方官必使其無意外之累乃可責以盡心
民事否則追呼日迫竭蹶不安誠如王炳壇所稟有不能一朝居
者尤慮不肖者滋弊擾民更於吏治有礙近年多倫廳一缺往往
視爲畏途皆無力捐賠木稅之故自應因時制宜變通舊例該藩

司等既查有密雲縣成案可循合無仰懇

天恩俯准將多倫廳水旱木稅自光緒十年起援案儘收儘解核實辦理仍由臣督飭藩司口北道認真稽查不得以多報少稍滋弊端違則參辦其以前各任仍照部議按數催追以示區別除照錄王炳垣原稟咨部外理合恭摺據實覆陳伏乞

皇太后

皇上聖鑒訓示謹

奏

淮軍報銷摺

光緒十年十二月初一日

奏爲淮軍收支款目自光緒九年正月起到十二月底止遵章列爲第十二案造冊報銷恭摺仰祈

聖鑒事竊照淮軍收支款項業經截至光緒八年十二月底止列爲第十一案報銷於光緒九年十月二十九日具

奏奉

旨該部知道單併發欽此並經循例造冊送部接准部覆按冊核銷在案伏查九年分淮軍分駐直隸各海口要地共馬步水師三十九營又調防朝鮮慶字親兵六營與各臺局護運餉械水陸哨棚並駐紮旅順礮臺護軍營哨及募補前次抽裁盛軍二成勇丁統歸淮軍案內彙冊請銷今自九年正月起到是年十二月底止列爲第十二案所有營哨官兵員名勇夫開收總數征防處所

先經造冊分咨軍機處暨戶兵工部備查又將支給正雜款項增裁數目遵照新章每三箇月開報一次亦已截至九年底止季報清冊先後咨送各部查核以上淮軍馬步水師各營並隨營辦事支應等差文武官弁親兵勇夫薪費口糧倒補馬匹柴薪車價駝騾喂養卹賞水陸轉運腳價夫工采製軍裝器械釘造修整船隻油艚經費正雜各款均循前案楚軍營制與

奏定章程及淮銷例案分別截清起止概按湘平折實庫平接續造報飭據淮軍報銷局司道逐款清釐查核舊管項下上屆截至光緒八年十二月底止存銀一百六十九萬二千三百三十七兩六錢四分八釐九毫五絲六忽五微新收項下計浙江四川湖北山東等省協餉並提撥江蘇藩關釐局額餉兩淮鹽釐等項及本案扣存平餘同軍火還價奉刪繳回各款共銀二百一十九萬三

千五百九十兩三錢三分七釐二毫六絲四忽二微以上管收兩
項共銀三百八十八萬五千九百二十七兩九錢八分六釐二毫
二絲七微內登除撥歸辦理電報事務直隸候補道盛宣懷等收
銷銀一萬七千四百四十三兩五錢七釐四絲九忽八微又撥歸
江蘇善後防營報銷局收銷銀一萬三千六百九十一兩九錢八
分一釐八絲六忽五微又撥放金陵機器局製造工價應歸該局
收銷銀二萬兩又附列專冊請銷補放淮軍各營光緒八年底以
前欠餉銀九萬三千一百一十九兩七錢五分二釐九毫六絲七
忽又本案附請專案奏銷洋鎗礮隊教習通事人等辛工礮費輪
船辦糧並購買外洋軍火價值運解礮火輪船水腳與天津行營
機器製造局工料用款及操練後膛洋礮拉礮車馬喂養夫工倒
補馬價等項計四冊共銀二十八萬四千一百九十兩五錢三分

七釐二毫二絲二忽實計收銀三百四十五萬七千四百八十二兩二錢七釐八毫九絲五忽四微開除正雜各款遵照部議酌定軍需報銷章程各歸各部核銷計應歸戶部核銷銀一百六十三萬五千九百一十四兩二錢九分八釐二毫七絲應歸兵部核銷銀三萬九百七十四兩八錢五釐二毫六絲七忽應歸工部核銷銀七萬六千六百一十五兩一錢六分八釐九毫九絲統共請銷銀一百七十四萬三千五百四兩二錢七分二釐五毫二絲七忽應存銀一百七十一萬三千九百七十七兩九錢三分五釐三毫六絲八忽四微已接支光緒十年正月准軍馬步水師營哨正雜餉項並購製西洋軍火器械價值工料等用歸於後案舊管項下滾接造報等情具詳請

奏前來臣查淮軍分駐直隸各海口拱衛

畿疆向資其力又調慶宇等營遠戍朝鮮保護屬邦並於奉省旅順口屯兵築壘遂漸籌布值此海防喫緊督飭各軍嚴備戰守餉需實關重要厯屆報銷案內截存銀兩皆係竭力設法節縮並將月餉酌量緩欠以備緩急之需近因法事決裂沿海及滇桂辦理征防各省關應解淮餉頓減且有積欠絲毫不解之處遂致厯屆存款動放殆盡此後如來源日絀恐難爲繼惟有隨時諄切催提冀可周轉所有造報光緒九年正雜款項逐款查核均係循照厯辦成案節節支發實用實銷並無絲毫浮冒除將收支各款分造細冊咨送各部並飭將以後用款接續清理造報外理合專摺具陳併繕開明清單恭呈

御覽伏乞

皇太后

皇
上
聖
訓

卷
一

軍需交涉洋務片

光緒十一年十二月初一日

再查淮軍各營洋鎗礮隊教習通事人等辛工礮費輪船薪糧並購買外洋軍火價值運解礮火輪船水腳及天津行營機器製造局委員人等薪糧公費工匠工食料物購價等項均屬例所不及並與洋人交涉至淮軍海防各營操練後膛洋礮拉礮車馬喂養夫工係照

奏明章程同倒補馬匹例價分別核實支給業將截至光緒八年十二月底止用款附片

奏銷在案此次造報光緒九年正月起截至是年十二月底止第十二案內前項各款遵照新章將增裁支用數目彙入季報清冊先後咨部茲據該司道等按款復加查核係照案接續支給並奉文飭發均無浮冒遵飭各歸各部核銷計應歸戶部核銷教習辛

工中外人等薪糧公費拉礮車馬喂養等銀七萬二千八百八十
三兩五錢有奇應歸兵部核銷輪船薪糧夫工船價運腳保險費
倒補馬價等銀二萬三千四十七兩三錢有奇應歸工部核銷油
飾小修礮費匠工購製外洋軍火料物價值等銀一十八萬八千
二百五十九兩六錢有奇三共計請銷銀二十八萬四千一百九
十兩五錢有奇照案分晰月造支銷細冊詳請附
奏前來臣查前項各營洋鎗礮隊教習通事工匠人等辛工購買
物料外洋軍火價值運腳各款多與洋人交涉無例可循仍應查
照歷屆成案據實請銷除將細冊咨送總理衙門戶兵工部查核
外伏乞

聖鑒謹附片具

奏

提撥運庫存款辦防片

光緒十年十二月初一日

再北洋海防經費專指各省關釐稅額年報解無多度支本極竭
蹙近自海防戒嚴後短解愈甚局庫搜括一空先後訂購德國後
門大礮數批明年陸續運到無款應付焦慮莫名茲查長蘆運司
額勒精額自去春到任以來整頓蠲綱催徵課帑勸諭各商勉力
輸將甚為得力除照常解支並添撥各項外計尚可提撥銀十萬
兩津沽為

京師門戶現當防務喫緊軍士枵腹荷戈利器及時儲備不得不
暫就本省庫款騰挪應急免誤事機除飭照數撥交支應局兌收
備放外所有提撥長蘆運庫各款銀十萬兩以濟海防要餉緣由
理合附片具陳伏乞

聖鑒訓示敕部查照謹

奏

考和四二

三

東明河工仍請東省協撥摺

光緒十年十二月初十日

奏爲東明黃河工需緊要關係直東兩省利害請

飭山東仍照原議歲撥銀二萬兩以免貽誤恭摺仰祈

聖鑒事竊准戶部咨開議覆山東巡撫陳士杰奏黃河防守事宜

及籌歲修款項一摺聲明山東每年應解直隸黃河修防銀二萬

兩據該撫請自來年起由直隸另行籌畫應由該撫自行咨商直

隸督臣妥籌辦理等因臣查直隸東明黃河地勢北高南下前因

大溜愈趨愈南緊逼隄根致高村李連莊黃莊頓成巨險曾於光

緒七年奏定酌設廳汛並派練軍常年駐工修防其應需各項料

物員弁津貼河兵口糧汛夫方價等項當時約略估計每年需銀

四萬兩經部議准自光緒八年每年由山東協撥一半銀二萬

兩務於頭年秋冬間如數解交大名道庫以便乘時購運料物毋

得遲延其餘二萬兩由直隸籌款濟用蓋此隄在直境僅止東明一隅若有漫決卽南注曹州等處其害實在東省初由山東建議籌款興築必須隨時合力修防方資經久近年高村等上中下三汛險工疊出屢有潰漫往往霜清以後工作尙難停手不得不多備料物設法搶護每歲用款嚴飭竭力撙節已需銀七萬餘兩較前奏四萬兩又添用銀三萬餘兩於河形變遷工料遞加事非得已特經前署督臣張樹聲與臣詳細奏報有案臣深知東省河工正急款項支絀是以每年添用銀兩未照各半分濟之案另請東省協撥卽本屆堵築漫口大工亦未照上屆之案奏請東省另加撥款原爲互相體恤之道茲陳士杰擬將原協銀二萬兩自來年起由直隸另行籌畫併此區區者而靳之如果直隸有款可措奚肯強人所難惟直省著名瘡苦又值災歉頻仍庫藏奇絀一切

年例餉款皆節節緩欠實較東省尤窘此項常年工費屢據司局稟詳委難全數獨任無可另籌而工程重要又未能停減不發原議東省協撥二萬兩係爲保衛直東沿河民命田廬合力通籌起見在直隸勉任修防並非自願一隅在山東協款恤鄰實則自保本境儼從此協款截止則直力不逮必至因費絀而誤事亦非東省之利也且原議本係經久章程未便遽爾停罷既經戶部奏令咨商妥籌自應將實在情形分晰陳明仍懇

恩飭下山東撫臣遵照原議每年撥解銀二萬兩以裨要工而顧大局其餘歲款約需銀五萬餘兩統由直隸竭力設法挪湊應急如此則東省協濟不及十分之三較各半之議核減已多自尙不甚爲難而地方保全不少謹繕摺據實具陳伏乞

皇太后

皇
上
聖
訓
示
施
行
謹

奏

礦務官本取償典息摺

光緒十年十二月初十日

奏爲前辦湖北煤鐵礦務動用官本及原發蘇典生息之款查照部議奏明辦理恭摺仰祈

聖鑒事竊臣前因道員盛宣懷等試辦湖北煤鐵礦務動用官本擬將餘款發商生息卽以息項歸補原本曾將詳細情形咨報戶部旋准覆稱該道開采三年夫工役食所費不少今不敢作正開銷設法彌補係爲慎重官項起見惟以息歸本應由該督詳查自行奏明辦理至蘇典另存生息一款據稱嗣後仍按七釐呈繳係照本部前行辦理惟前行係令自光緒十年三月起今請自十一年三月起是否筆誤其已經減去息錢六千三百串未便據咨准減亦與兩江總督原奏典商減利聲明各處官款生息無過一分之案未符仍飭補繳等因當經轉飭遵照茲據局員議覆前來臣

查蘇興原存直隸練餉制錢十二萬串光緒七年九月以前本係七釐生息嗣因前兩江督臣左宗棠奏減典商取民之息並寬民開取贖之期商力竭蹶懇將存款十二萬串一併減息臣以該商等歷年繳利已及二十萬串於直隸河工賑務甚有裨助而蘇興自奏減取息後商人獲利更微酌准減息二釐自七年十月以後五釐生息以恤商艱前准戶部咨令自光緒十年三月起仍照七釐行息飭據各商以沿海告警市面蕭條商情萬分苦累且奉文已在光緒十年三月以後若自十年三月起按七釐生息力實未逮萬不得已請自十一年三月起再按七釐行息以前仍准減息等情並非原咨筆誤至左宗棠原奏謂各處官款生息無過一分係指江蘇本省各衙門零星公款而言可由地方官隨時催備此項練餉制錢係隔省公款且數至十二萬串之多與本省零星官

款不同是以酌准減爲五釐現值海疆多事蘇省風鶴時驚各典
生意不能如前復據懇情籲懇若責令卽自十年三月起並補繳
以前准減之息實多苦累委員祇有轉發守提之責亦無從賠補
國家惠商恤民賦稅皆從輕減自應體察官息商情兼籌並顧應
請仍自光緒十一年三月起再按七釐生息其以前准減二釐之
息並免補繳以示體恤至礦務動用官本係於光緒二年臣會同
前兩江督臣沈葆楨前署湖廣督臣翁同爵奏撥直隸練餉制錢
二十萬串試開湖北廣濟興國等處煤鐵派道員盛宣懷會同前
漢黃德道李明墀辦理欽奉

諭旨允准該道等稟明由總稅務司赫德在英國代雇礦師郭師
敦及洋匠三名來華試辦自光緒二年至五年所需礦師洋匠等
薪水川資製備各項器物及用西法發探阮家山窩子溝煤礦用

土法開挖廣濟興國煤窯四十餘座又勘辦大冶武昌鐵礦修造
廣濟縣沿江隄工暨運煤道路除售煤及物料變價以收抵付外
其動支制錢十萬六千四百餘串曾據逐月分晰開報有案其時
通盤籌畫須有常年經費銀六萬兩始可經久開采以供各處製
造並以庫款支絀常年經費難籌不得已飭令截止官款另行招
商接辦其動用制錢十萬六千四百餘串飭由盛宣懷墊發制錢
六千四百餘串淨缺制錢十萬串因以用贖制錢十萬串發交江
蘇各典生息卽將按年所得息項彌補原本緣此舉迥非商人承
領官項開礦盈虧官不過問者可比祇因經費不繼不得已而截
止改歸商辦其動缺官本亦未敢作正開銷是以爲生息彌補之
計誠如部咨係爲慎重官項起見原議須至光緒十五年本利全
清以完原撥制錢二十萬串之數前因款難緩待飭再提早一年

以光緒十四年全清俾昭迅速茲復詳查前後辦法均係實在情
形道員盛宣懷等歷次詳稟並無担飾泰西各國開辦礦務多由
其國家撥款接濟其虧折固屬恆情但能官商合力歷久不易卒
底於成中國限於經費難與大利然動用官款必應設法彌補此
案前已責令盛宣懷墊發制錢六千四百餘串現議提早一年歸
還本利又須賠貼制錢一萬串已屬不遺餘力勢難再令認賠應
請仍照原議由蘇興各商生息於光緒十四年全數完繳歸還原
撥之款責令盛宣懷按期催收儻有虧短惟該道是問庶官款無
絲毫欠缺各典商亦不致受追呼逼迫之累所有查照部議奏明
辦理緣由理合恭摺覆陳伏乞

皇太后

皇上聖鑒敕部查照謹

奏

卷五十一

五

上海酌設臺捐局摺

光緒十年十二月十六日

奏爲臺灣軍情喫緊待餉甚殷請在上海酌設臺灣捐局遴員核實辦理冀廣招徠藉資接濟恭摺仰祈

聖鑒事竊據江海關道邵友濂江蘇候補道龔照琰稟稱戶部議奏臺灣開捐實官用濟軍餉業蒙

特旨允行該道等奉委辦理臺灣後路事宜疊次雇備輪船裝運勇械並借濟赴臺用款均由出使經費項下動支惟此項經費原存者已經江南提用新收者尙有應撥專款後難爲繼蘇省庫藏已竭更屬自顧不遑必須妥籌應急期免貽誤現在旣准開捐若專在臺灣一隅辦理本地紳富多已遷避卽有勉力輸將者爲數恐亦有限外省士民雖不乏情殷報效但遠隔重洋難通輪船若令冒風濤兵革之險攜帶重資前往上兌必致聞風裹足上海爲

中外通商總匯之區士民往來甚便昔年各省捐輸無不來滬勸辦今雖市面不及從前若能設法招徠稍可挹注請於上海設臺灣捐局照章收捐庶後路轉運用款與前敵軍需兩相維繫等情具稟前來伏查臺灣待援孔亟軍餉告匱疊奉

諭旨設法籌助臣前已竭力撙湊銀十五萬兩陸續匯解赴臺昨又撥銀五萬兩並派精銳弁勇七百餘人攜帶精械雇船運往先後奏明在案惟前敵軍情喫緊需用浩繁待餉多而且亟上海後路轉運亦需巨款誠如邵友濂等所稟必須妥籌接濟該道等以臺灣一隅收捐有限上海爲通商總匯較易招徠擬設臺灣捐局係爲前敵後路兩有裨益起見戶部原奏僅准臺灣開捐其時尚無各省統開捐例之議今續經奏准各省一體開捐以濟海防要餉則已無分畛域且臺灣旣奉

諭飭他省籌助若於上海設局收捐實屬名正言順在該地方官亦誼不容辭臣電商劉銘傳意見相同合無仰懇

天恩俯念臺灣孤懸海外時事迫切軍餉萬緊就地無可多籌迥非他省可比

特准上海酌設臺灣捐局容臣等遴派妥員會同邵友濂等查照戶部續奏章程核實辦理不得稍滋流弊所收捐項除上海轉運事宜留用外餘卽匯解臺灣應急各捐生履歷獎冊卽由該局隨時送臣咨部核給執照如此一轉移閒則前敵後路軍需稍資接濟而捐生無須攜資冒險並得就近核獎給照辦理較速人情亦便捐務或有起色臣爲臺餉緊急設法籌濟謹會同福建撫臣劉銘傳恭摺山驛具陳伏乞

皇太后

皇上聖鑒訓示施行謹

奏

酌設海防捐輸局摺

光緒十年十二月二十日

奏為直隸海防捐輸擬在天津酌設一局就近督飭核實辦理冀廣招徠藉收實效恭摺仰祈

聖鑒事竊准戶部咨開會議海防需餉甚緊請暫准部庫及各省開捐實官常例一摺十二月初八日奉

懿旨依議欽此飛咨到直當經轉飭遵照茲據藩司崧駿會同天津司道籌議具詳前來臣維直隸為

京師門戶海防至關重要必須餉項應手乃可設法布置各省關應協經費頻年解數無多近因法事決裂各省皆有防務往往留為自用報解益少本省司局各庫已搜羅殆盡現值嚴備戰守應發各營薪餉及訂購西洋鎗礮價腳款無所出來歲更不知如何支持莫名焦慮茲欽奉

懿旨開捐係為濟時艱萬不得已之舉自應仰體

朝廷實事求是至意妥速籌辦查原奏應由各省督撫徧行宣示以廣招徠實濟海防之用責成藩司遴委委員在該省核實辦理不准委員向他省添設分局統令交藩庫上兌由藩司發給實收按月造冊咨部核准換給執照惟直隸情形與他省不同保定雖屬省會而僻居腹地附近並無富紳大賈新章僅減二成當此物力艱難招徠非易且直屬著名瘠苦災歉頻仍僅指本地士民捐輸斷難踴躍即使設法勸導而省城地處偏遠他處捐生交納不便轉阻其報效之忱也現駐天津非他省藩司與督撫同城者可比即以每月造送捐冊而論津省公牘往返稽延亦易啟捐生之觀望據該司道統盤籌畫必期捐局不致虛設因查天津為北洋要口自各國通商以來已成重鎮南北士商往來雲集設局勸辦

較可收效擬保定省城仍由藩司收捐外並在天津由臣遵委委員酌設捐局責令隨時會商藩司遵照部定章程核實辦理仍由藩司印發正副實收以昭慎重如此則天津地處通衢招徠稍易由臣督察妥辦每月獎案可迅速咨部核准給照以便捐生所收捐項按月截數報部就近撥充海防軍餉此外軍營糧臺一概不准收捐亦不准委員赴他省添設分局臣查核該司道所議係爲畿輔海防需餉緊急藉收實效起見僅止上兌之處稍予變通以免捐生遠交藩庫徒多跋涉此中無關弊竇部臣本令廣爲招徠實濟海防爲要義天津係屬直境設局勸辦正與部議委員在該省辦理之意相符仰懇

天恩俯准照辦以濟急需其未盡事宜隨時督飭妥籌辦理務杜流弊如查有委員稍染從前捐務積習卽由臣從嚴參辦理合恭

摺陳請伏乞

皇太后

皇上聖鑒訓示遵行謹
奏

李文忠公奏稿卷五十一